

31 MAR 1999

Umno-Peguam

JAWATANKUASA NAMAKAN PANEL PEGUAM

KUALA LUMPUR, 31 Mac (Bernama) -- Jawatankuasa petugas menangani fitnah Umno hari ini menamakan 20 peguam yang menganggotai panel peguam parti itu yang akan mewakili Umno mengambil tindakan undang-undang dalam kes fitnah melibatkan parti dan pemimpinnya.

Mereka ialah peguam rasmi Umno Datuk Zaki Azmi dari Rashid & Lee, Mohd Noor Amin Mohd Noor Khan (Amin, Yap & Co) sebagai setiausaha panel, Muhammad Shafee Abdullah (Shafee & Co), Mohd Maydien Tapil Ahmad (Maydien & Associates), Datuk M. Kayveas (Blanche Kayveas & Co), Datuk Vijay Kumar Natarajan (Kumar Jaspal Quah & Aishah), Darryl Goon (Raja Darryl & Loh), Tengku Mohamed Fauzi Tengku Abdul Hamid (Tengku Mohamed & Alan Lim), Appandi Ali (Appandi Ali & Co) dan Mohamed Razif Abdul Aziz (Aziz & Mazlan).

Peguam lain ialah Muhamad Burok (Abu Talib Shahrom & Zahari), Datuk Abu Zahar Nika Ujang (Abu Zahar Syed Mohd Fuad & Partners), Halizah Abdul Halim (H.A. Halim Thye & Co), Noh Omar (Ahmad Famy & Noh), Muhammad Nadzri Hamzah (Nadzri Hamzah & Co), Ubaidillah Awang (Ubaidillah Aziz & Co), Wan Nadhri Mohd Fauzi (Wan Nadhri Tan & Goh), Mohamad Kamaluddin Zainoorin Madros (Kamaluddin Zainoorin & Co), Hermes Media Putra Ibrahim (Chooi Shee Hong & Hermes) dan Mej (B) Haji Ahmad Shafie (Aziz Zakaria Shaiful & Wan).

Pengerusi jawatankuasa itu, Datuk Paduka Ibrahim Ali berkata anggota panel peguam berkenaan diluluskan oleh Majlis Tertinggi Umno pada mesyuaratnya 17 Mac lepas.

Katanya panel itu akan mengumpul maklumat sendiri mengenai isu fitnah dan memburuk-burukkan pemimpin parti selain mengkaji maklumat yang dikumpul oleh jawatankuasa petugas bagi membolehkan tindakan diambil ke atas mereka yang terlibat.

Jawatankuasa sedang meneliti 30 kes yang membabitkan isu menghina mahkamah dan memfitnah pemimpin, kata Ibrahim kepada pemberita selepas mempengerusikan mesyuarat pertama jawatankuasa itu dan panel peguam berkenaan di ibu pejabat Umno di sini.

Setakat ini dua tindakan akan diambil berdasarkan laporan polis yang dibuat Sabtu lepas terhadap Mohamad Ezam Mohd Noor kerana menghina mahkamah oleh Ketua Pemuda Umno Selangor Jaya Kusuma Rusman dan laporan polis membabitkan Dr Hassan Ali kerana mencemar nama baik Perdana Menteri Datuk Seri Dr Mahathir Mohamad yang dibuat oleh Ketua Pemuda Umno Wilayah Persekutuan Abdul Azim Mohd Zabidi.

Kedua-dua kes itu melibatkan artikel mereka yang tersiar dalam akhbar rasmi PAS, Harakah.

Ibrahim berkata tindakan akan diambil terhadap dua lagi kes menghina mahkamah melibatkan seorang pensyarah kanan sebuah institusi pengajian tinggi dan seorang pemimpin politik yang kini giat mengadakan ceramah di seluruh negara.

Laporan polis akan dibuat mengenai mereka tidak lama lagi, katanya.

Menurut Ibrahim mulai sekarang jawatankuasa itu akan meneliti setiap artikel, kaset ucapan dan ceramah politik yang mengandungi unsur fitnah untuk diambil tindakan.

-- BERNAMA

AKT RON